

Fréttabréf

Hörgárbyggðar

1. tbl., 8. árg., 5. janúar 2008 Ábm.: Guðmundur Sigvaldason

Frá félagsheimilinu á Melum

Um áramótin lét **Pórður V. Steindórsson** frá Þríhyrningi af húsvaðarstarfi félagsheimilisins Mela í Hörgárdal eftir langt og farsælt starf, sem honum eru færðar kærar þakkir fyrir.

Frá áramótunum verður sú breyting á umsjón með Melum að pantanir, greiðsla reikninga o.þ.h. færist til skrifstofu Hörgárbyggðar. Hjónin í Lönguhlíð, **Bragi Konráðsson** og **Eva María Ólafsdóttir**, hafa tekið að sér umsjón og eftirlit með húsinu sjálfu.

Tekið er við pöntunum í síma 461 5474, faxnúmeri 461 5475 og netfanginu horgarbyggd@horgarbyggd.is

Húsaleigubætur

Sækja þarf um endurnýjun á húsaleigubótum fyrir árið 2008. Til að hægt sé að greiða húsaleigubætur fyrir janúar um næstu mánaðamót verður skrifleg umsókn um endurnýjun að berast skrifstofu Hörgárbyggðar fyrir 25. janúar 2008. Umsóknareyðublað er að finna á heimasíðu Hörgárbyggðar, undir auglýsingar (vinstra megin).

Skrifstofa Hörgárbyggðar

Skrifstofan er opin að jafnaði frá 10:00 til 12:00 og 13:00 til 15:00 á virkum dögum, nema á föstudögum. Símatími er á sama tíma.

Sími: 461-5474, fax 461-5475. Netfang: horgarbyggd@horgarbyggd.is.

Veffang: www.horgarbyggd.is

Um áramót

Árið 2007 var viðburðaríkt á vettvangi sveitarstjórnar Hörgárbyggðar. Helstu málin á árinu voru, eins og ætíð, afgreiðsla fjárhagsáætlunar fyrir árið 2008, sem fram fór núna í desember, og afgreiðsla ársreiknings fyrir árið 2006, sem fram fór í apríl og maí sl. Velta sveitarfélagsins hefur vaxið talsvert á undanförunum árum og er hún nú mjög að nálgast 200 millj. kr. á ári. Langmestur hluti af tekjunum fer til fræðslumála. Á árinu 2008 er áætlað að um 72% af rekstrargjöldum sveitarfélagsins renni til þess málaflokks.

Framkvæmdafé sveitarfélagsins á árinu 2007 fór líka að langmestu leyti til fræðslumála. Lokið var við viðbyggingu leikskólans. Kostnaður við hana, endurbætur á eldri hlutanum og ýmsa innanstokksmuni varð alls 51,6 millj. kr. Leiksvæði þelamerkurskóla var endurgert með nýjum sparkvelli og vönduðum leiktækjum. Kostnaður við þær framkvæmdir urðu alls 21,6 millj. kr. Hluti þess kostnaðar var greiddur með rausnarlegum styrk frá Sparisjóði Norðlendinga og einnig rann hluti leigutekna af heimavist skólans til framkvæmdanna.

Aðrar helstu framkvæmdir á árinu voru endurbætur á Hlíðarbæ, upphaf gatnaframkvæmda á nýju atvinnusvæði við Lækjarvelli og gangstéttagerð í Birkihlíð.

Á árinu 2007 var alls tekinn fyrir 291 dagskrárliður á 12 fundum sveitarstjórnarinnar. Að meðaltali tók afgreiðsla hvers dagskrárliðar um níu og hálfu mínútu.

Skipulagsmál

Skipulagsmálin voru fyrirferðarmikil á árinu. Stærstu verkefni á því sviði var framhald á gerð aðalskipulags fyrir Hörgárbyggð og deiliskipulag fyrir nýtt atvinnusvæði við Lækjarvelli.

Haldinn var fjölmennur kynningarfundur um aðalskipulagið 15. febr. Þar var farið yfir stöðu málsins og kynnt þau drög að skipulagsuppráttum og greinargerð, sem þá lágu fyrir. Á haustdögum var lokið við drögin og þau send til yfirlestrar og umsagnar nokkurra aðila. Nú í janúar verða þau til lokayfirferðar og afgreiðslu hjá skipulagsnefnd og sveitarstjórn. Gert er ráð fyrir að fullmótuð tillaga að aðalskipulaginu verði formlega auglýst á útmánuðum og að það öðlist svo gildi síðar á árinu.

Deiliskipulag Lækjarvalla tók gildi á árinu og er gatnagerð skv. því komin vel á veg. Úthlutað hefur verið fjórum af þeim sex lóðum sem eru á landi sveitarfélagsins sem er innan skipulagssvæðisins. Einni þeirra var skilað og eru því 3 lóðir á svæðinu lausar. Talsvert hefur verið spurt um þessar lóðir og gera má ráð fyrir að þeim verði öllum úthlutað á þessu ári.

Önnur skipulagsmál á árinu vörðuðu íbúðabyggð á Gásam, staðsetningar á stökum húsum á jörðum, framkvæmdaleyfi fyrir efnistöku o.fl.

Jarðasölur

Á síðasta ári voru seldar tvær jarðir í eigu sveitarfélagsins, Mið-Samtún (ofan vegar) og Skútar. Þá skiptu jarðirnar Þríhyrningur, Neðri-Rauðilækur og Krossastaðir um eigendur og auk þess komu nýir ábúendur að

Barká. Jarðir í Hörgárbyggð virðast vera eftirsóttar, enda búskaparskilyrði þar góð og víða heppilegt land fyrir frístundabúskap og sumarhús.

Vegamáli

Vegir í Hörgárbyggð þarfnast víða verulegra endurbóta. Eins og í mörg undanfarin ár, var á síðasta ári enn vakin athygli alþingismanna og Vegagerðarinnar á þessari staðreynd. Þrýstingur undanfarinna ára á þetta mál hefur borið nokkurn árangur, þar sem á vegáætlun þessa árs eru fjárveitingar til Hörgárdalsvegur og Dagverðareyraryrvegur. Blómsturvallavegur og Hlíðarvegur þurfa enn að bíða en þess er vænst að röðin fari að koma að þeim.

Núna um áramótin tóku gildi ný vegalög. Með þeim taka sveitarfélögin við umsýslu með vissum vegum sem áður voru í umsjá Vegagerðarinnar. Ekki er ljóst hvaða áhrif þessi breyting muni hafa, en vonandi leiðir hún til þess að framkvæmdir við viðkomandi vegi gangi hraðar en hingað til.

Samstarf við nágrannasveitarfélögin

Sveitarfélög hafa með sér mikið samstarf um ýmis mál og því meiri eftir því sem þau eru nær hvort öðru. Samstarf Hörgárbyggðar er að jafnaði mest við Arnarneshrepp, Akureyrarbæ og Akrahrepp. Á liðnu ári gekk samstarfið vel á öllum sviðum og átti það sinn þátt í að góður árangur náðist á árinu í þeim málum sem um var að ræða. Gott dæmi um það er fyrirliggjandi samningur um uppbyggingu Gásakaupstaðar (sjá baksíðu).

Menningin

Tveggja alda afmæli Jónasar Hallgrímssonar þann 16. nóv. sl. ári fór væntanlega ekki fram hjá neinum. Þá lauk endurbyggingu íbúðarhússins á Hrauni með því að forseti Íslands opnaði þar minningarstofur um Jónas. Þá var á árinu áfram unnið að málefnum Gásakaupstaðar (sjá baksíðu) og Leikfélag Hörgdæla sló í gegn með uppfærslu sinni á Síldinni. Því er óhætt að segja að menningin hafi leikið stórt hlutverk á svæðinu á síðastliðnu ári. Framangreindir sögufrægu staðir, auk Möðruvalla og fleiri slíkra á svæðinu, gefa einstaklega góða möguleika á að þróa þar áfram ýmiskonar menningartengda starfsemi, héraðsbúum öllum og landsmönnum til heilla, jafnt í andlegu sem efnalegu tilliti.

Byggðarmerki og skilti á sveitarfélagsmörkum

Hörgárbyggð tók byggðarmerki í notkun á árinu. Það er komið á heimasíðu sveitarfélagsins, á bréfsefni þess og á eina gerð af umslögum. Það mun svo smám saman birtast á öllum öðrum gögnum sveitarfélagsins.

Þegar byggðarmerkið var tilbúið var samið við Vegagerðina um að setja upp skilti með því og nafni sveitarfélagsins þar sem vegir koma inn í það. Til stóð að þau yrðu komin upp fyrir veturinn en tafir urðu þar á, en þess er vænst að nú verði ekki langt að bíða að skiltin komist upp.

Hér hefur verið tæpt á nokkrum helstu málum á vettvangi sveitarstjórnar Hörgárbyggðar á síðasta ári, en plássins vegna verður að láta þetta nægja að þessu sinni. Undirritaður þakkar fyrir ánægjuleg samskipti við íbúa sveitarfélagsins á liðnu ári með bestu óskum um gleðilegt nýtt ár.

Guðmundur Sigvaldason

Vantar aðstoð við búskapinn?

Tek að mér ýmis verk við bústörf, bæði tímabundna aðstoð og lengri/fastar afleysingar.

Gestur Hauksson, sími 690 7792

Sorpgámarnir við Mela og Jónasarlund eru alls EKKI fyrir málma og heyrúlluplast

Sorpgámarnir við Mela og Jónasarlund eru eingöngu fyrir almennan úrgang. Skv. lögum er bannað að setja málma í almennan úrgang og heyrúlluplast er reglulega sótt til bænda.

Auk þess eykst kostnaður sveitarfélagsins vegna förgunar úrgangs að óþörfu, ef í gámana eru settir hlutir sem ekki eiga að vera þar.

Næsti söfnunardagur á heyrúlluplasti (baggaplasti)

er 14. janúar 2008. Minnt er á að vanda frágang plastsins, svo að meðhöndlun þess og endurvinnsla gangi sem best.

Gásakaupstaður ses.

Í síðasta mánuði var sjálfseignarstofnunin Gásakaupstaður stofnuð. Tilgangur hennar er að vinna að uppbyggingu þjónustu- og sýningarsvæðis á Gásakaupstað og til að miðla upplýsingum um hinn forna kaupstað. Þar á að vera hægt að fá heildstæða upplifun á því hvernig lífið var á Gásakaupstað á miðöldum. Vonast er til að þar muni skapast ný og áhugaverð atvinnutækifæri, auk þess sem þar verða varðveittar mikilvægar menningarminjar svo að komandi kynslóðir geti notið þeirra.

Eigendur sjálfseignarstofnunarinnar eru Akureyrarbær, Dalvíkurbyggð, Eyjafjarðarsveit, Gásafélagið, Grýtubakkahreppur, Hörgárbyggð, Minjasafnið á Akureyri, Svalbarðsstrandarhreppur og Laufáshópurinn (Gásahópurinn). Á stofnfundinum var sagt frá styrkjum sem Fjárfestingarbankinn Saga Capital og KEA hafa ákveðið að veita stofnuninni.

Hörgárbyggð sótti um framlag á fjárlögum ársins 2008 til uppbyggingar Gásakaupstaðar og fengust 10 millj. kr. Á síðasta ári fengust 5 millj. kr. til þessa verkefnisins af fjárlögum og þá veitti Ferðamálastofa styrk upp á aðrar 5 millj. kr. til að koma upp snyrtihúsum á staðnum. Þau voru sett upp sl. sumar. Fleiri styrkir hafa fengist til þessa verkefnis.

Næsta sumar verður lagður vegur að minjasvæðinu og gert þar bílastæði. Þá verða sett þar upp upplýsingaskilti. Miðaldamarkaðurinn á Gásakaupstað hefur fest sig í sessi sem ferðamannaviðburður og hann verður á sínum stað helgina 18.- 20. júlí næsta sumar.

Næsti fundur sveitarstjórnar verður 16. jan. 2008

Dagskrá fundarins mun birtast á heimasíðu sveitarfélagsins síðdegis 14. jan. og liggja frammi á skrifstofunni frá sama tíma